

南

禹峰先生文集卷之二十二目錄

尺牘二

與黃仲霖督學書

時提黔兵駐邵戊子夏

與王念尼督學書

與戴巖犖書

與李保菴書

答史閣部道鄰郤聘書

與吳天目書

與衡州道張宜男書

復戴侍郎書

與然石書

與庚生書

與澤州馬孝廉書

與吳若谷師書

與胡總督書

公諱全才文水人

上經略書

復趙掌院門書

上高郵相公書

與汪翰林煉南書

與張湛虛前司馬書

與荆門鄭總鎮書

復邵武馬都督書

與夔陵張總鎮書

諱太元

與張爾公書

與張爾公書

與吳文淵書

與吳文淵書

與吳文淵書

與張燕然同吳書

與王解林勳南書

與高濂公書

與嚴掌司門書

禹峰先生文集卷之二十二

南陽禹峰彭而述著男直公彭始搏編

嘉興秋岳曹溶

江寧鞠人張芳

評

尺牘二

與黃仲霖督學書

嶽麓江上居停倉卒遂復分袂西來炎暑泥

雨胥途五月初旬輒抵邵邵召也即召伯化

行南國處郡城東三十里蓋有召伯祠暨其

棠渡云棲棲旅人日與兵子語鮮暇晷未臨

其地聞棠樹鏤幹銅柯扶疎四十丈數人乃

合抱之此三千年餘物也計宣尼手植檜在

曲阜者遇此可稱阿季若孔明廟前栢則益

益間茉莉秋海棠耳容當選期為此物作頌

付郡乘不敢遂曰賡蔽芾三章也沅芷為入

黔門戶自當事者聞警入星沙皮張諸渠乘

勝長驅席卷而東七百里偽令直逼新化第

出銳師擣之頗獲奇勝賊以郤新寧苗徭雲

起數十柵寨營壘相望郡城旦夕且不保復

得我兵間道兼程出其不意汎掃之新寧平

武岡為陳賊因圍凡三閱月城內粒米成珠

善馬肉為戰士糧勢必再難久持黔旅饑其

中者七百人王兵別無一人應援者武岡不

守寶慶尚可言乎寶慶動則衡永長沙間盜

勢言形勢指掌觀火真巨備心眼

賊蜂起直待王師到時收拾又得半年此其
大○可○寒○心○者○也○若○夫○南○有○何○郝○北○有○王○馬○可
日○姑○置○此○數○子○於○度○外○乎○弟○命○久○未○見○綸○音
局○外○人○爲○局○中○持○籌○未○免○越○俎○大○氏○處○漏
舟○安○危○共○之○不○得○不○於○高○明○商○及○此○也

前叙景物後陳國策兩段文字自有關應
之妙

與王念尼督學書

二別山頭兄弟各持滿一觴孤舫南來黃葉
蕭蕭爭下今洞庭木葉復爾歲月如駛良晤
不可多得爲之增歎弟於黔之役歷夏及秋
俱在楚中爲楚疆掃除餘孽頗費經營羣盜
如蝟山巖險阻民苗雜居反覆不常昔馬叅
軍謂諸葛丞相曰南中恃其險遠今日破明
日復反願公服其心由今思之固爲至言亦
由渠魁未除以致草間椎埋之徒乘其竊發

不但服心之難也。楚入黔路有三總以沅州
 爲第一門戶。今常德有王馬。新化有皮張寶
 武有陳叛。三路既已不能入。而沅州又爲賊
 所有。棲棲馬上。鎧鋌生蟣虱矣。北道旌旗何
 時可至。或當聯轡夜郎耳。邵爲楚僻郡。目中
 不見邸報。鄉闈定於中秋否。明珠大貝在漢
 江之濱。唯使者掇之耳。辰陽寇逼已久。慶餘
 臥不高枕者數月。近援兵頗至。睥睨無恙可

卜也。德安舊廣文張鵬翼。以聞父喪北歸。走
 謁堦墀。張風木在念。未免傷貧。乞吾兄或假
 一二事善遇之。惠等麥舟矣。

不但服心爲難。是實落經濟武侯高馬君
 一等者此耳。

與戴巖犖書

八年離緒對酒中宵。唾壺方殘。如意隨舞。東
 方白矣。主客徑醉。豈止齊贅八斗平原十日。

尺牘二
哉。足下以人中龍象，照耀下國，正如仙籍謫
來，結成大白，歲星下賁，是爲方朔。文士左官，
古今一轍。柳河東不至永陽，則鉅錡潭。至今
一蹄涔耳。誰復知之者。子瞻不到黃州，彼赤
壁石原在嘉魚。何遂得爲子瞻有哉。南陽此
後，草廬白水增高深矣。巖犖此來焉可少哉。
郡邑乘文獻所關，亦必待大手筆續成之。山
西志強半在弇州之文與詩，以弇州曾爲彼

中觀察。滇南志則全出升菴之手。以升菴在
永昌時爲當事，辟聘故能成此盛舉。後之觀
者，不謂秦無人，是在足下。經碧筵詩古鏞，曾
吟一洗靡曼之音，是父是子，彼孝威者，恰足
鼎峙。近日僞景陵輩，肉袒牽羊道左，恐後矣。
康文士開山川未有之奇，故每每相需。寧云
事數奇哉，出手听然大有地步在。

其源與李保菴書

某郎官湖上扁舟粵來逆旅酒脯敢勞下執
事揮手曰歸猶蒙繾綣訂以荊州之約仁公
氣誼隆重鉢心矣何足言感自抵里塵坌蝟
紛應酬兩月男子張君嗣頗爲勞頓况非丞
相長史乎頃有客自武昌來者聞和鸞已入
郢上矣白雪城中復有宋玉其人者鼓柷西
來大堤之曲在耳交甫之珠耀眸伏龍鳳雛
或且拜公牀下于以張楚當有進于漢陽諸

姬者幸爲某言之屬又有西粵之役計日且
就道矣舊弟子幾人蹉跎連年不甘自棄希
將昂首天衢鼓浪龍門借我晨風脫彼毛穎
惟台臺留意所謂一經品題便作佳士耳江
水不寒息壤尚在蕤賓前後圖晤匪遙
不語落天葩佳氣葱鬱

自表答史閣部道鄰卻聘書

相公閣下九廟依毘三靈憑式念高皇帝櫛

沐提封。三百年所。一旦星隕海飛。圯絕乃祀。自非先生手闢中興。力襄再造。則江南此日不可問矣。嗚呼。興師問罪。削平禍亂。上受九廟之靈。下開萬年之業。此子儀光弼李綱諸君之烈也。竹帛盟府。光贊之矣。某梓里末學。仰止高山。作令邊城。闌跚二載。毛檄幾何。潘輿莫待。間關千里。自荆棘豺虎中。避亂江左。客武林時。讀先生宗社危情一檄。此太原勸

進之表。而興元哀痛之詔也。敬業操觚。武墨奪魄。陳琳擗管。阿瞞頭痛。不足言矣。顧念草土之人。無復四方之志。有公等在天下。事尚可為也。方抱膝蕪關。捧誦良書。言念蓬蒿。拔起方任。共獎王室。知己之感。其曷能已。顧禮有所不可踰。而情終有所不可奪。苦塊餘生。無復生理。知先生有以洞見此心矣。有關名教。非尋常卻聘之文。

與吳天目書

丁亥長安與我天目蕭寺共醉紅燈灑激白
 雪繽紛是何等時耶未幾我馬南征子輸北
 滯楚水燕山迢遞萬里杳杳魚鴻風鶴為阻
 不才而述朱紱幾何動應白簡牂牁之郡未
 開中山之篋已滿而彭子歸矣自此隱身屠
 釣潦倒長干營菟裘于西山庶幾高郁披鶴
 氅而跨黃牛不愧梁震殆絕口不復談天下

事矣惟為海內故人素與肝膽性命相連者
 縈結不能盡去則未有如君家兄弟死生存
 亡之在念者也念我橫溪以賈洛陽之才而
 有陸士龍之遇嗟乎才子無命抑至此哉然
 李固死而有渤海王調汝南郭彥為之貫械
 上書杜喬死而有陳留楊匡為之號泣星行
 道義之感人故舊之俠烈也禹峰等愧死矣
 不有天目橫溪其能不冤呼地下否耶每有

良朋况也。永歡爲天目賦棠棣之詩焉。今天目爲太守。且徽州太守矣。不知者以天目之才。天目之識。天目之膽爲之。我則曰。此天目之義也。義則可以籲上帝而泣鬼神。可以通九五而感同列。彼一官何足榮人哉。有兄之叩闥。則可以知弟死之受枉。有兄之賜環。則可以知弟寃之已雪。如天目者。真當求之古人矣。臨節義而爭死。當患難而讓癯。又何足

多哉。鑑湖自嶺外挾其二人。與其兄孝源。喪歸。間關萬里。荼毒一身。曉然人倫之際。有天目之遺風焉。扁舟吳會。投刺故人。天目能不爲之動念哉。新讀皇詔。二三知己。乃欲以放逐之人。彰之啓事。襤被蕭然。長安珠桂。天目幸助我便風一帆。直達滕王閣下。是王子安見長之秋也。雖然。禹峰亦爲此言。天目必笑之。然非天目。禹峰必不能爲此言也。天目哉。

尺牘二
茲鳴鴈落刃迎牛解

與衡州道張宜男書

石鼓臺上殘雪蘭膏夜話飲冬青酒太醉殊
樂此事別來已三年矣仁公不績弘茂名在
朱陵他年叔子片石與祝融爭高俯眎峴首
培塿耳弟自返初服棲遲隴畝與襁褓父老
擊土鼓傾瓦盆南望湘水未嘗不思公子也
茲緣新野馬太史有女在馬鎮處聞大將軍

物故諸姬俱已分散歸宗此真盛德事也太

史公有子雲孫爲弟兒女親念天屬之誼意

圖珠還千里馳使與其當事者曾有成說但

恐事有中違不獲竟如前議稔知仁公與幕

府諸公深相友善倘不惜片言九鼎令此女

生還玉門卽太史公地下能忘所報哉昔文

姬遠涉沙漠得魏武爲之贖歸再適董祀雖

與中郎曾有舊好要以義俠所動不忍先哲

一。血。胤。淪。陷。他。族。此。其。事。再。見。楚。南。使。者。矣。

先生義可千古文特婉摯

復戴侍郎書

飛觀翠袖。驪歌征魂。黃葉槭槭。秋蟲唧唧。旌
旗雲擾。鼓吹山沸。當斯之時。君入承明。我返
故廬。新雨如絲。客淚如霰。况復多情。何以爲
懷。自鑿聲漸遠。欵段西馳。某卽於故山猿鶴。
刑牲醴酒。結爲死友。悠悠薄俗。知心有幾。覺

孝標絕交論。猶有未工。某交遊海內二十年。
前有覺斯。今有巖老。平生肝膽性命止此矣。
某自巖犖去後。意興索然。念我巖犖。投分以
來。知入道之難。且知入世之難也。私心自慰。
巖犖真師表我乎。華髮如星。年事將暮。而始
聞所未聞。見所未見。在巖犖不知於世人。何
如某竊以爲得於巖老者。爲逾涯矣。何必王
充論衡。始稱異書異人哉。九月廿後。棲托鄉

尺牘二
庄良書適至。良朋念我至矣。三子俱戰北而歸。五兒黃吻。更蒙垂念。但恐小時了了。大未必然。經碧伯仲。俱天下才。尚未見北雍賢書。知阿弟一舉負青冥矣。

入道入世。惟先生與侍郎。乃如水乳之合。

與然石書

黔陽別棹。羣盜如毛。鷄臙對酒。鷓鴣亂啼。鴻影參差。猿烟羃歷。當斯之際。誠難爲懷。彈指

八年。離愁十斗。不謂伯氏遂成永訣。感血屬之同氣。念患難於在原。依徙短髮。誓結來生。有弟及壯。羈旅天末。搔首東南。縈魂海嶠。兩次遊楚。里門閭然。驛書萬里。忽責今春。况有阿咸。覩縷數紙。自念年來。摧頽功名不立。撫枕中夜。覽鏡徬徨。蓼蟲桂蠹。行當衰朽。然石春秋正富。有才如海。策杖河北。正鄧禹封侯之年。破敵江上。看淝水成功之日。箕裘勿替。

不振家聲。是在吾子。隨陸不武。絳灌無文。待
 吾然石起而兼之耳。屈平之賦。乃在放廢。虞
 卿之書。成於窮愁。凡古人之卓犖自命者。類
 有德業。散見於世。不屑以文字成名。其以文
 字成名者。太都皆不得已者也。相如有開西
 南夷之功。而竟以賦掩。右軍有止殷深源北
 伐之略。而乃以書傳。豈二公之心哉。卽此推
 之。李贊皇不由科第。司馬君實不工四六。此
 古人三不朽之業。所以屈立言於二者之下
 也。頃讀來書。則然石所不足者。非文矣。努力
 建監。勿負良時。晤乾震長夏人淑。亦以此言
 告之。無以老耄而舍我也。

前段讀之。凄切。後段讀之。慨慷。字香句艷。
 覺徐庾猶是儉父。

與庚生書

弟自一落泥塗。摧頽莫振。短髮如星。壯志灰

壤然丈夫官不可作。心跡不可不明。弟始末緣由。具小揭中。長安此來。自恃曲江兄弟。台鼎有人。引手雲霄。剖雪前青。首惟太司馬是望。乃銀臺喉舌之地。因鬼實難。只尺不得見天子。昔人所痛。計惟有長沙之遊。可當背城一戰。中樞政府。既相表裏。而一以宰相行師。一以樞密運籌。同功一體。情事實然。昔子厚貶竄。推挽無人。昌黎所以致歎。張負除籍。公

論難掩。皇甫因而上書。年台國家柱石。凡事從公。忠起見弟。所以責望。年台者。正以其公忠也。屢奉明旨。除大計城池。而外。皆得昭雪。今自陳。既已無路。而當路。又無代之言者。舍年台。誰望乎。况南方卑溼惡地。高明暴足。而又鬼方盤瓠。叛服不常。今何苦孜孜爲言哉。此其意。非爲溫飽明矣。或者亦欲乘時展布。立功名於竹帛。以報知己耳。陸賈孱儒也。而

有定南粵之功。相如賦才也。而懋開夜郎之績。况夫磨墨檄楯。貫甲穿扎。合金而成一人者。也。年台又何惜此咫尺之書。令其立功萬里之外。不使文成威寧。諸公擅美於前乎。惟大司馬垂照焉。不宣。

其聲揮綽其氣高明。較青蓮上韓荆州書更有地步。

與澤州馬孝廉書

鐵騎濁河。羊腸東竄。亂山齒萃。絕壑崿呀。周回萬里。迤邐十年。俯仰今昔。有同隔世。向讀三晉賢書。知門下奮飛秋雲。為知己稱快。明月照乘。不乏連城之價。霜蹄千里。自有市駿之人。故人老矣。扶風之道。大著是在。康成揚雄之文。不死賴有鉅鹿耳。

節短韻長。是兩漢手筆。

與吳若谷師書

尺牘二
甲申春夏南渡倉皇扁舟武林追隨函丈時
值險阻多蒙邪翼言念德音有踰生成自不
奉教於今十年聊浪三楚蹉跎兩鬢朱游徒
髡無補蕭傳京房未死有愧焦公進退無據
身世多慚每望南雲中情百結向讀邸報見
吾師久彰啓事堅臥東山昔當塗旣燼楊彪
不起典午云亡徐廣流涕吾師名儒舊德照
耀古人仰止高山緊惟門下小子哉偶因李
生便羽奉候興居勉慰加餐神與俱往
俊逸在晉魏人亦應遜此

與胡總督書

峴首分袂雅意慙慙前荷良書獎拔實深羈
棲湖南不覺歲暮讀邸報見節下榮膺帝簡
總督川湖聖明南顧樞密得人叢爾滇黔唾
手版圖天下自此定矣唯今辰陽方開已控
滇黔之喉若得勁旅一枝直搗武崗則黎靖

沅沘卽成破竹之勢。不腆孫逆。一鼓成擒矣。此其事唯明公能辦之。皇上于羣議之外。獨懋特簡。此一統之業。將成而進取之機。甚銳也。會見潁川永昌之芳躅于明公。再見之矣。某蹉跎半生。壯心未燼。將欲附驥尾以成名。干青雲而直上。不能不重望于明公矣。昔唐室靈武之勛。成于郭李。乃臨淮實出汾陽門下。宋家西夏之功。成于韓范。乃希文實魏公所薦舉。明公當世英雄。不讓古人。某優游鈴閣。帷幄左右。深蒙國士之知。未効一割之用。私心實用恥之。鄧伯華策杖河北。而興竹帛之恩。劉豫州流落荆南。而發髀肉之歎。豈徒然哉。夫亦謂知己不多得而時乎。不能再來也。惟明公何以爲某策之。

命世之才不容高臥。言言皆爲乘時策勳起見。

上經畧書

述頓首相公閣下。時維鼎革。興王崛起。必生
碩輔。贊襄草昧。惟閣下以師臣之尊。當樞相
之權。夔龍方虎。合成一人。德業威名。曠代無
二。述自成童之年。卽抱執鞭之願。昔韓愈備
員於裴公。遂成淮西之烈。蘇軾上書於文潞。
願稱門下之士。不敏如述。竊聞斯語。願以十
載蹉跎。幾悞一生。今幸天子聖明。俯從人願。

得邀綸綍。叨附門墻。惟願閣下。壯猷懋建。早
定南方。列夜郎而作縣。鑿昆明以爲池。山河
帶礪。鐘鼓式靈。述得勉効尺寸。竭蹙鞭策。分
竹帛之餘光。附雲霄而直上。是所厚幸矣。
語次有樹標銅柱之槩。屹然偉抱。

復趙掌院洞門

草茅外吏。兩遊京華。造謁龍門。深荷吐握。感
不去心。每念先生鯁骨。讜論朝野。想望其風。

以元祐之舊德作甘陵之表帥公道在人九
 重眷注旦晚黃麻渙汗誕膺爰立之舉為蒼
 生慶霖雨矣某流落十年重遊舊地念從前
 心跡未明行能無所表見意欲鞭策末路為
 桑榆之舉而時命不偶棲遲如故好我如先
 生何以為駑駘計之

閒閒數行正自雋永

上高郵相公書

相公閣下。贊襄元化。弘濟蒼生。房玄齡遇主
 于關中。遂肇貞觀之政。鄧伯華從王于河北。
 爰成建武之勳。况復以平章軍國之司。兼冢
 宰常伯之位。考三載于舜典。準八法于周官。
 世傳光庭之選舉。再見山公之啓事矣。某鍛
 羽連年。蹉跎半世。緣心跡未明。將欲用所未
 足。嗟桑榆之已晚。走承明而上書。謬蒙閣下。
 力申公道。拔之泥塗。更荷皇恩。重遊舊地。此

毛君脫穎之年。祖生著鞭之會也。自渡洞庭。忽焉改歲。乃機緣不偶。坐縻時日。郎官之首。空白。將軍之數自竒。中夜徬徨。殊生髀裏肉。生之感。仰負生成。我勞如何。自念早歲不羈。留心幹畧。壯傳介子班。定遠諸君之爲人。亦欲立功闔外。傳名竹帛。不謂歲月不居。漸成老大。一墮世網。便去十年。人生幾何。能禁此等消磨耶。閣下於某起死而肉骨矣。尚望始終爲某計之。若猶是碌碌公等。爲平原賣漿之客。某亦不能鬱鬱久居此矣。

末語脩然雲霄之上

與汪翰林煉南書

風塵下走。接讀馬遷之書。如對木難火齊。小草數行。不揣髻薛。請質座隅。譬之虫羽之響。或以脛鳴。或以注鳴。置之鐘鏞之間。非其倫矣。文章出詞翰圖書之府也。外是者固可寬

論乎。

無數頓挫一轉一妍

草草與張湛虛前司馬書

丙戌殘臘雪夜痛飲屈指前遊又復十稔何

况南渡倉惶洒淚新亭時乎先生故國柱石

名同韓范時逢百六永賦白駒龔勝楊彪諸

人輝映千古中州不有先生嵩河黯然某遊

元禮之門且二十年出處無狀蹉跎日老又

有湖南之遊猿鶴笑人不足爲先生道路經

錦里口占四詩聊展契濶行色匆匆恐唐突

爲勞專役叩候殊爲依依

先生每一揮毫累累千言皆成龍文五彩

卽此隻字何減朶雲良由才偉學富

與荆門鄭總鎮書

見可而進知難而退武之善經也功成名遂

身退立身之善教也古來得此道者惟鴟夷

子皮與韓氏子房耳。不謂今日復得將軍。惟是荊州國之西門將軍。世之名將。自鬲革以來。與巨寇相持。已十四年。此中山川形勢。賊之情偽。將軍悉之矣。滇黔未闢。歸巫之間。眈眈虎視。將軍一旦遂其高。拂衣而去。誰能當此任者。劉越石守太原。祖士雅守雍丘。韋節度之鎮成都。陸都督之鎮西陵。多者十餘年。少者亦不下數年。當時豈更無一人焉。可以代之。而朝廷之上。孜孜焉不肯舍者。則以非諸公莫辦此耳。將軍今日之荊州。又何異乎。取鯨鯢而戮之。滇黔既闢。京觀用築。則是大將軍角巾湖上之日也。

大義凜然。出語固自肆好。

復邵武馬都督書

鬲革之交。天造草昧。乘時以建殊勳。遇主而奮鴻名。此豪傑之士。投袂而起。不甘與草木

同朽。進取而有爲也。蘭谷束髮從戎。歷戰有聲。當聖主之龍興。解甲而識天意。在昔王常率下江之兵。以從世祖。英公投黎陽之戈。而向關中。不是過焉。至如創闢閩海。用邊東南。呂嘉授首。九郡皆清。盧循就擒。瘴鄉無恙。凡此膚功。具在司勳。勒名景鐘。用彰帶礪。則知聖主拊髀而思。未嘗一日忘鉅鹿也。弟少負不羈。頗有封侯之願。顧時命不偶。蹭蹬老去。所望海內知己。共此心期。涼風天末。殊增搖落之感。心中如結。不能悉宣。

英雄之色見于眉宇

與彘陵張總鎮書

史稱公瑾雄烈。膽略過人。又云人與公瑾交。如飲醇醪。不覺自醉。合二事。一人觀之。公瑾而外。不可多見。今日西陵張將軍。殆庶幾焉。蠢茲西氛。牙孽未平。我師蓄力已久。飲馬昆

尺牘二
再此先生書
明計在指日。唯將軍勉之。男子值此時。不封侯。只虛生耳。

先生以公瑾與人處。正堪自命。

與張爾公書

某作諸生時。卽知海內有所爲爾公先生云。爾公名重鷄林。著作行世。如火齊木難見者。知欽。某私心嚮往。欲得一申杵臼之誼。藏之中心久矣。不獨孔文舉知有劉豫州也。頃得

次尾長君。悉先生近狀。始知客白門。操三寸枯竹。進退天下士。且較讎古今文苑。用付名山。當今手執牛耳。與羣雄爭長。獨立壇坫之上。取猪羊狗之血來。信非爾公莫任。則爾公爲此中宿將。直是汾陽退居之後。少收部曲。便成一旅。略煩關外一行耳。葢爾小草。願副明公以行。先生能爲我龐德操乎。曩年遊燕。得友吾鄉大士。大力文止諸君子。近年來復

得篁菴初士諸君所恨者未識爾公耳。今復
得以吳子布腹心于下執事則南州高士無
留良矣。

爾公得先生推許遂足取信天下

禹峰先生文集卷之二十三目錄

尺牘三

與劉輿父札

與許菊谿書

與王藉茅書

上湖南直指書

上偏沅開府書

與提學李素心書

與楊猶龍書

復鄖陽趙僉事書

上經略雲貴情形書

與開封守朱公書

與汴司李吳菊存書

與郭按察書

與趙糧道書 諱廷臣

答蘄州汪徵五書

回趙韞退書

南上經略書

嘉興秋高書

尺廣三

與劉真父札

乙酉西陽游旅泊江左得尊大人借棧一枝印

次之安爰得我所每於晨夕曠論劇談上下

與楊猶龍書

復鄖陽趙僉事書

上經略雲貴情形書

與開封守朱公書

與汴司李民翁存書

與郭按察書

上巡舉書

回蘇驛書

禹峰先生文集卷之二十三

南陽禹峰彭而述著男直公彭始博編

嘉興秋岳曹溶

孝感人淑夏嘉瑞

尺牘三

與劉真父札

乙酉鼎沸旅泊江左得尊大人借棲一枝即

次之安爰得我所每於晨夕曠論劇談上下

千古各有江左夷吾之意。倉卒言別，豈謂遂有今日。次尾化碧尊大人亦復乘箕。言念江東舊遊，強半鬼錄。輒生山陽之感。與父鴻材著書不墮家聲，近見子班亦復楚楚。伯宗次尾兩先生爲有後矣。某進退無據，蹉跌半生。今老矣，潦倒朱陵，事與心違，計拂衣歸里，只在今秋。倘得江漢風清，扁舟東下，盡攜生平小草，借與父爲我甲乙，付之棗梨，立言一事，

雖不敢妄擬古人，然男兒生世適當此時，旣不能宜壯猷立殊勳，與蕭曹寇鄧諸人爭烈，又不能逃名深山，猿鶴爲伴，并與麋鹿俱死，區區以三寸不律，與慧黠小兒爭不可知之名於千秋之後，意悲而心苦矣。十五國風斜川行，得附羣公之後，與父知言哉，然而某報斜川矣。

立言是先生第二著德功固鼎峙不朽

與許菊谿書

丙申春杪。自里門送親家鄒鄙之南。君飲建業之木。我逐衡陽之鴈。招提斗酒。投淚相別。吳頭楚尾。歛爾三載。客潭之日。讀邸報。知爲亡賴。李官所望。議倉猝軍中。瑣瑣旅次。未遣一介奉訊。抱歉至今。臘盡抵衡。突豨適至。百事蜩集。窘急萬狀。先是有童僕不戒。以牽馬小事。致釀邑人之災。幸賴餘庇。無恙。然地方兵馬之衝。穠苗窟宅。槃瓠習氣未化。官其地者。真尹。猿狄。一二守令。復不湊手。早知如此。何必多此一出。方圖所以去此矣。親家才力。福命十倍于弟。目前小青。前旨已自昭然。以兄之退局。當弟之進步。十級而登。猶如甌窶之望。泰岱時乎。不再來。如天下蒼生。何也。

鬱抑之語愈見骯髒

與王藉茅書

客歲春夏間。曾有一札托楚糧使者齎去。建康此後亦不見此君回信。則真到石頭城矣。每思陸敬輿。蘓子瞻輩。皆以冲年膺主眷。入翰林。一時推爲文章宗匠。乃出而佐主行間。剖符治郡。所到之處。才鋒輻輳。經濟聲華。老成人之所不如。今日取似我藉老。古人可作矣。於越勾吳之間。薦紳委巷能言之。非一人之私言也。弟自乙未春明。與我藉老握手言

別。羈棲楚中。又復兩歲。去冬乃承乏衡陽。何物老革。突如其來。雷霆之威。虺蜴之性。令人人馬辟易數里。計芻糗菴閭之費。米鹽瑣細之物。以及供給應付之役。取辦于旬日之間。荒殘之地。官同廝養。民不堪命矣。私笑賈生當文帝之世。不屑與絳灌爲伍。汲長孺。楫平陽。漢史以爲美談。二公不知生。今之世。又當何如也。長安米珠薪桂。得蒙緩急之惠。此誼

何減管鮑專役馳候殊媿遲遲實木匠之罪人矣。

先生文章氣節自是賈汲一班

上湖南直指書

職某疇昔不揣謏劣妄欲有所建明於世上者得如陳湯甘延壽諸人立功絕塞下者則如馬遷丘明董賈諸人著書立說以有聞於後不謂負數多奇蹉跎以老二者交譏進退

無據自到朱陵得沐先生青盼是海內猶知有盛孝章也冀奮其伏櫪之志以收功于桑榆將欲用其所未足而今先生行矣人生知己不多得某亦從此逝矣處荒殘疲劇之地百事掣肘而又日與絳灌爲伍誠不能鬱鬱久居此矣有可以爲某善去後之策者或不吝緩頰當事之前乎倘得秋風一棹永遂柴桑之願異日名山之業以報知己則先生爲

我桓譚矣。茫茫江漢。把晤何期。身雖羈旅。祝融之麓。而心已隨片帆。飛建業之東矣。

岳岳自命。頽眎古今。

上偏沅開府書

自大師西征沅靖。一帶迎刃而解。壯謀雄烈。遂闢黔中。淮陰定齊。唾手七十餘城。馮異入關。赤眉瓦解。異世同符。沅芷爲西南絕徼。地氣復與長沙桂陽諸郡不同。尤望加餐珍重。蓋萬里長城所係矣。

竟是漢人筆札

與提學李素心書

文旆過宛。校讎之餘。星戟遙發。草草追隨。仁公世誼隆重。古道照人。真覺斷梗腐株。一經丹艷。輒與豫章增價。兒搏黃口。俯承接引。昔北海弱齡。通刺元禮之門。仲宣蚤歲。倒屣中郎之座。政恐始而如狼。繼而如羊。遠媿古人。

有負子將識拔耳。炎暑流汗。披讀法書。何啻
伯英十紙。煥若神明。浮雲驚龍。釵股漏痕。不
足方其渾脫。爲兒輩觀型。庶幾毛傳鄭箋哉。
異日推本所自。則韋誕之於陳留錢。懷素之
於鄔兵曹也。秋初有共城遊。百泉沸珠。古樹
屯風。當與仁公坐臥其下。以當平原。

雲錦冰紈繪素俱異

與楊猶龍書

頃入國門。從藉茅處。讀先生制作。蓋代才也。
騷壇牛耳。狎主齊盟。意在斯乎。自別元禮。馬
首分飛。見台節鎮晉陽。爲神京右臂。手開皇
之故宮。尋尹鐸之殘堞。孟門太行。飛狐倒馬。
揖拱几案。龍門藏書。河汾遺簡。不足供其吐
納矣。弟潦艸南征。因人成事。苗壘鬼方。展布
何時。難爲知已道也。往遊并州。有狄梁公三
堡。一作倘公餘。搜志乘取之。荒烟蔓草中。爲

付棗梨俾弟筮仕舊地。一片心血得借明公
以傳。回首長安。息壤尚在。知不忘季諾耳。

讀是書可得先生登高望遠之懷

復鄖陽趙僉事書

麋城天險。扼南鄭商於之喉。先代之末。中原
所在焦爛。獨此稱繞雷之固。則地勢使然。抑
人力也。近謝羅西鄙。房陵。谿。研。為。荆。楚。窟。頻
年勞羽檄。使者相望。黑。闔。之。壘。未。平。青。犢。之。

氣尚旺。密邇宛鄧。尤勤奔命。自蔡戟星。責風
聲所屆。餘孽蒙駝。繼以洑口之捷。筑陽之捷。
魚釜盡矣。今尚有鷹眼未化。狐嘯夜聞者乎。
叢爾殘寇。慮不足以膏齊斧矣。弟甫抵星沙。
即向鈴閣快談此事。以為荆襄上游。今得砥
柱西北。可高枕矣。廿載陳人。老遊幕府。徒抱
留侯之病。借箸無籌。未有毛生之才。脫穎何
日。渺渺江漢。故人萬里。天末涼風。一函遠賁。

愧感交集矣。

經濟觸手皆見

上經略雲貴情形劄

雲貴一道。漢唐以來。皆入職方。其進取之路。必先由黔中。明太祖十四年。始由黔開滇。黔今貴州。滇今雲南也。永樂十一年。乃置貴州土司郡縣。先是貴州原隸川湖。今本朝定鼎十三年。餘孽孫可旺。憑險負固。以雲貴爲窠

穴。湖南兩粵。每歲用兵。迄無寧日。所以然者。

雲貴爲湖南兩粵堂奧。湖南兩粵。雲貴之門

戶也。故雲貴未下。則湖南兩粵。非重兵不足

以守。雲貴旣開。則湖南兩粵。不守自平。此一

勞永定之計。開國帝王。大一統之弘規也。某

讀史見唐蒙司馬相如諸人。皆以書生建旄。

置牂牁郡。而開西南國。未嘗不心慕之。幾欲

投袂而起。志在封狼居胥間矣。顧以半生偃

蹇。十載沉淪。推挽無人。坐失機會。只今聖明
南顧。推轂元老。王侯將相。半出門下。非閣下
無可以奮功名者。以故請命南來。側身幕府。
既懷知己之恩。復感國士之遇。謹因論雲貴
之事。聊綴瞽說。用供葑菲之采。惟閣下不棄
駑駘而教之。

抵掌時事。烈若觀火。真將相才也。

與開封守朱公書

中原腹心。梁宋舊都。兵燹薦至。河伯不仁。汴
民其魚。夷門壑矣。明公五馬遙臨。荆秦漸起。
邇又金堤底績。宣房築官。良二千石厥功懋
哉。

祿之兩漢中。不復能辨。

與汴司李吳菊存書

雍丘旅夜。秋月如珪。觀縷相宣。蘭膏共醉。甫
離河橋。又承祖餞。誰何渥也。兒輩嬰疾。臨場。

以致蹉跌。自而清斷。有負丹青。衰頹如弟。坏
戶十年。猿鶴夢穩。謬蒙山公之舉。又有伏波
之遊。眞黔未下。軍書如雨。才愧韓愈。竊附晉
公以行。略慚陸賈。願平佗尉而歸。鞭短汲長。
有識攸笑。仁公當世管葛。肝衡時事。曾盤成
局久矣。鴻羽有便。幸爲教之。

氣度閒遠。絕似晉人。

與郭按察書

憶昔江夏草昧。得與仁公共事。掃除艱辛。藍
縷之中。且忽忽十年矣。昨歲郢上。邂逅良緣。
復得一申肺腑。念切故人。綈袍云贈。綵言江
樹。情深漢水。仁公以清霜紫電之才。當龍翔
鳳翥之會。持斧南紀。萬邦爲憲。行且望鼎。鶴
以調梅。徵星辰而聽履。弟襪才碌碌。無所短
長。放逐餘魂。壯心都盡。願以十年舊遊之地。
對此老態婆娑之人。補救無術。面目可憎。仁

公愛我不啻同氣。倘緣稱引。夙昔不忘。杵臼左提。右攜。免於垂鑿。則鮑叔不足言矣。質實卻有餘致。

與趙糧道書

之官入衡。曾奉訊一札。料入掌記。只尺衣帶。真若天塹。采葛之思。伊鬱如何。竊念弟以今上龍飛之年。筮仕江北。既而叨轉湖南。分符芝山。是為丁亥。今丁酉。且十年矣。拓落不偶。猶復與祝融君對語。十年之內。翱翔澤國。真如洞庭之鴻。春來秋去。疑有定期。則人生官祿。誠有地耶。

讀此者應用薔薇露浣手

答蘄州汪徵五書

弟於十一月廿日。抵衡受事矣。才疎志廣。恐遂不能了此。為知已憂耳。假王就戎索。此自經臺壯猷所致。從此叔子當陽望肩背矣。省

會僚友亦復知世間有劉備安敢忘推轂哉。善事上官勿失名譽弟每笑此言今乃韋弦佩之顧力行何如承大教良友同心更以相勉耳。

善事上官數言自是曼倩之豪

回趙韞退書

臨江爲祖宗墳墓所在弟墮地以來未曾拜掃亦不知其楸栢若何或遂化爲樵牧馬鬣

無存矣得此中建牙使者停筆一問纔經族子封樹弟遙聞泣感不減宋季奴入關重謁十帝園陵矣渝水荒餘今戶口暫有生人之樂皆明賜也客歲冬日有衡陽遊諸事棘手與老兵對語更不堪耳長安舊雨綺閣紅燈邈若山河王年兄至接讀鴻篇目中不見此等文久矣華峯殘雪美渠高寒爲一代傳人無疑此事譬之用兵貴得利耳傳介子孤軍

直搗。改樓蘭爲鄯。善正不在多。否則五諸侯。
九節度之師。不足貴矣。王年兄猿鶴盟。堅往。
而不返。縱之爲吾輩中管寧可乎。郎君齟齬。
雙瞳奕奕。必非凡人。今且若干尺矣。
軒乎而起。悠然而住。思之無盡。

上丞相書

某除夕之夜。得長沙來書。讀之不覺拔劍起。
舞。雖身羈岳麓。而心已飛於金馬碧鷄之外。

矣。自念某早負壯志。欲立奇功。不謂命實偃。
蹇。蹉跎十年前。見師相。秉鉞南中。延攬豪傑。
共襄太平。請纓南來。蒙師相不次之恩。隆以。
國士之遇。抵掌進取。談笑微中。在他人或姍。
以爲安。惟師相深鑒其區區之意。以爲將用。
其未足。夫士屈于不知已。而伸于知已。撫膺。
感奮。每欲得當。以報生成。不意前奉有師相。
回京之旨。某意興索然。意謂某亦從此歸矣。

安能鬱鬱久居此也。臨別泣涕，與師相曾有成說。今幸天假良緣，敵國來歸，師相山河帶礪，方在指顧，門下士附青雲而施後世，當不止某一人，而某一人尤有不能已于言者。且以爲某可以用，滇黔者有四焉。一定南之疏尚在也。師相前日兩疏吹噓，不遺餘力，正爲今日耳。沅靖一帶情形了然，心目誠未有如某者。左右行間用備指畫，撮米爲山谷不足

言矣。二者某從定南日久，與線伯李蝦諸鎮相友善，同心協力，共尋小王，以報定南之恩。其素所畜積然也。其三則某爲孝廉時，曾奉熊理院檄，與今之秦王講招撫于穀城，稱舊識。部曲中諸大頭腦，尚有識予姓名者。臨機制度，用間用奇，此亦曠世一事也。又其四者，以某撫貴之日，曾募勁旅一枝，自落職後，或隱身屠釣，或散處山草，星羅襄鄧，潛沔間。今

但飛檄一招可得雄師一隊不減羽林鐵鷄
軍矣此四者皆某之所以用滇黔也師相不
欲平雲貴則已耳

結語屹若嵩華泰岱

禹峰先生文集卷之二十四目錄

啓

候楚督李公啓

候楚撫張公啓

候湖南按院周啓

諱季琬吳人

賀李總督生子啓

復線伯書

諱安國

與黃鷗潛方伯書

與中州朱學臺

吳人

與孫刑廳書

山東人

賀黃布政陞太常

候撫臺張年

啓

時孫王歸順

青詞爲經略洪公作

迎柯提督小啓

時戊戌秋征叛卒

禹峰先生文集卷之二十四

南陽禹峰彭而述著男直公彭始搏編

嘉興秋岳曹

溶

江寧鞠人張

芳

評

啓

候楚督李公啓

伏以元老爲君股肱聿播雄風于赤縣尚書
司帝喉舌旋瞻華蓋于朱陵玉質金相文昌

武庫恭惟閣下。盧龍萃胄。司馬名家。元禮聲稱。舊傳洛下。臨淮壁壘。尚在河陽。謝玄策淝水之勳。髫年秉鉞。公瑾擅江東之譽。早歲登壇。幕府開天。雄畿輔爲神京肩背。已嚴鎖鑰于北門。樓船下江漢。荆楚乃荒服。咽喉更借長城于萬里。五谿之蠻烟未靖。非伏波不任將軍。江陵之遺祚尚存。惟衛公乃稱總管。夔陵接白帝。近聞杜宇之聲。漢水通岷江。不借

金。牛。之。力。旣。開。南。郡。遂。取。西。川。子。陽。躍。馬。而。稱。孤。恃。險。難。憑。劔。閣。桓。公。抗。表。以。催。敵。取。道。必。由。彭。模。况。復。西。南。之。版。圖。原。屬。山。河。之。帶。礪。莊。躋。以。將。軍。略。地。由。黔。中。入。滇。池。乃。王。靡。莫。之。國。唐。蒙。以。中。郎。持。節。從。笮。關。抵。夜。郎。遂。置。犍。爲。之。郡。聖。世。有。分。土。無。分。民。王。者。旣。有。征。還。有。戰。緬。茲。數。國。之。形。勢。統。惟。長。子。之。師。貞。地。旣。迅。於。建。瓴。兵。還。同。夫。破。竹。職。方。從。海。

外。雲。連。銅。柱。冥。冥。天。使。到。日。邊。地。湧。金。沙。浩。浩。從。此。南。人。不。復。反。無。勞。七。縱。七。擒。譬。彼。西。夏。解。稱。臣。不。數。一。韓。一。范。某。分。叨。駑。吏。才。愧。書。生。浪。遊。南。服。者。十。年。徒。抱。請。纓。之。志。景。仰。高。山。者。數。載。欣。逢。御。李。之。時。庸。能。挽。銀。漢。以。洗。兵。尚。期。聞。鼓。鼙。而。思。將。

流麗無版摺痕唐宋名家不足擬此

候楚撫張公啓

鴻鈞律轉陽春。紫極動三能之色。玉燭光連太乙。朱方築萬里之城。帝簡在心。天方授楚。恭惟閣下。三韓闕閱。百代圭璋。舌爲帝師。黃石傳圮橋之略。氣運斗柄。茂先識寶劍之精。從隆準于故豐。功在平陽之右。扈真人于白水。名居高密之先。在昔珥筆承明。蘭臺遙映東華月。只今攬轡紫陌。華蓋新開南浦雲。爭雄長于漢上。諸姬非復。華輅藍縷之舊。興義

師于江黃夔子。還如包茅縮酒之年。戰壘平。邾城陶入州。勲名尚在寒烟。嗚赤壁周公瑾。壯烈依然。峴首足十年之糧。輕裘不讓叔子。西陵贊一統之業。武庫直逼當陽。某荒陲下吏。蠹簡腐生。對此鋒燹殘黎。復值羽書。旁午。景春陵之遺軌。難忘撫字之心。慕武都之壯猷。良非將帥之選。情馳北面。仰候南車。文信國風。標千仞尤。擅四六之長。良與司

馬温公異

候湖南按院周

彩筆出承明。衣惹蓬萊雲尚溼。仙舟臨楚甸。檄飛江漢雨初寒。三湘草木知名萬。邦文武爲憲。嚴霜倍凜。化日欣臨。恭惟閣下。東南間氣。館閣名流。筆湧三江五湖之奇。才據龍盤虎踞之勝。蘭臺視草。方士龍入洛之年。赤縣乘驄。乃司馬游梁之後。維皇南顧。特簡西臺。

念楚子原自雄風。方城漢水曾已齊盟乎諸。
 夏兼祝融本司火政。洞庭蒼梧豈敢自外于。
 南巡沅有蒞兮。澧有蘭。嗟美人之遲暮。雲為
 車兮風為馬。見公子之來遊。望濂溪而訪遺。
 經伊洛傳真儒之緒。弔赤壁以揚鴻烈。阿瞞
 銷僭竊之魂。凡茲前徽君家故物。况夫載酒
 問南樓月色。欣同庾亮開尊。鳴榔看青草湖
 光。忽聽湘靈鼓瑟。雲夢九百里。全羅相如留

中。衡岳七十峰。不出昌黎杖底。惟是遐荒卑
 溼。民生些窳。以偷安兼之戎馬。雕殘天災流
 行而互至。禾陽不治。難云士元非百里之才。
 春陵未寧。誰倩杜老為道州之句。某廿載陳
 人。半生朽質。久遭放逐。潯陽留司馬之衫。濫
 叨新恩。漢高擬神女之珮。重遊舊地。實愧并
 州。繡斧未臨。高山仰止。倘蒙伯樂相馬。飾駑
 駘于天閑。庶幾公輸掄材。貯樗櫟為國棟。將

再峰先生文集 啓
見收曹沫于末路。因成壇坫之功。錄馮異于將來。未覺桑榆之晚。緣茲匏繫。未遂循墻。敬修蕪函。用代負弩。

極整飭。極蘊藉。才人無所不可。

春賀李總督生子啓

伏以虎節垂聲。已見奇勳。推帶礪。熊祥叶夢。復聞奕世重箕裘。當英物奮生之年。正王師捷伐之日。喜隘南國。歡動屬員。恭惟閣下。三

韓閔閔。歷代簪纓。四世三公。象笏簇聯床之盛。五侯七貴。魚軒逐寶馬之塵。談笑而靖趙邊。名滿雲中。代郡指顧以開唐祚。功成雪夜。淮西始張幕府於澶淵。領魏博青淄宣武諸道。爭傳鉅鹿之軍。旌旗曾照長安月。旋錫彤弓於江漢。合百粵陸梁南詔之疆。獨控建瓴之勢。鎖鑰全歸萬里城。惟此荊州之舊封。喜見仙根之挺秀。陶太尉建八州之績。戡亂江

東宜象賢之輩出。郭令公統九路之師。平定
河北。乃錫羨之無窮。鍾星流嶽降之祥。胚胎
結成將相。誕南陽豐沛之里。襁褓便是王侯。
黃鵠磯頭抱鳳雛。聞聲者如出丹穴。鄂渚江
上奮龍媒。望氣者指爲渥洼。建襄陽之殊勳。
前身知是羊開府。恢武昌之霸業。生子真如
孫仲謀。從此白馬誓黃河。爰賴功臣之苗裔。
佇看紫泥開赤社。常裹鞏固之金甌。某三沐

將誠願獻華翁之頌。一白馳賀如披玉樹之
風。伏惟鑒茹。曷勝瞻企。

每讀警句想見坡仙

復線伯書

恭惟爵下三韓。萃胄百粵。長城越絕。傳君子
之兵。渡長淮而問秦晉。荀卿論天下之將。張
舊楚以睨孫吳。玉帳臨河。魁白起。原是豎子
鈎。陳出紫極棘門。何啻嬰兒。甘陳懸萬里之

旌衛霍增五等之秩。在本朝實特典。於先王
爲有光。弟一介書生。久愧封侯之相。三楚勞
吏。謬叨上公之知。想元王設醴之情。穆生之
座未冷。感錢君祖餞之意。太真之酒尚溫。顧
五月蒞潭州。望嶺外之樓船。真同天上。乃七
年別幕府。想河陽之壁壘。如在目中。漢家不
棄先零。故勞充國。爲方略。唐室遠開。六詔因
煩西平。以經營。佇看標日南。以爲銅如。讀伏

波之傳。行見列九州。而鑄鼎重回禹甸之春。
遙捧良書。因風感舊。言念夙昔。搔首如何。逐
馬蹄于淮西。濫叨裴公之帳。仰狼封于瀚海。
願勒班固之銘。秋風蕭蕭。黃花燦燦。固已身
羈。長沙之國。心飛尉佗之城矣。

烹字煉句歸于自然

與黃鷗滔方伯書

台臺琮璜上器。奎壁名流。植玉笋于蓬壺。冊

府食神仙之字。扞牙籌于軍國。封侯推轉輸之功。飛輓雲集于東南。見牛車擔石之相屬。謳歌日普于江漢。誠催科撫字以兼收。邇者南荒多事。聖主焦勞。呂嘉睥睨于粵州。未懸北闕之首。雍闓跳梁于溪洞。尚勤五月之師。一切士馬輻輳。冠蓋紛紜。靡不望武昌而稅駕。計皆伺方伯以唱籌。常平之米。一時獨重于耿侯。運漕之功。奕世同符于劉晏矣。弟廿

載陳人。半生棄物。追舊雨于長安。思黃公于

江夏。燕關千里。一別經年。木落霜寒。嗟洞庭

橘柚之已晚。郵筒書至。與衡陽鴻鴈而金來。

念良友於金城。轉瞬還圖麟閣。召明公於華

省。回頭卽是鳳池。臨楮主臣。不盡觀縷。

舊雨黃公之句。膾炙于殊

林。于與中州朱學臺

恭惟台臺學富天人。胸涵河洛。精誠辦白下

之馬識正練于吳門。星宿探黃河之源。鑄羣材于梁苑。中原草昧。於焉重光。下里文風。由斯丕振。治某叨產豫州之鄉。久知海內之有文舉。究心誠正之業。敢忘翼聖之有新安。緣以廿載陳人。碌碌戎馬。一麾南荒。悠悠關河。徒厯班荆。未酬御李。仰溯高山。調饑如何。敬修片羽。專達函丈。自非中表。敢勞掌記。倘緣愛屋及烏。采下體以無遺。庶幾拔茅連茹。望風瞻溯。神與俱往。

尋常叙次絕與人異

與孫刑廳書

恭惟明允司廷尉之平。春蒸白水。祥刑勤士師之職。道濟蒼生。擲地金聲。久傳天台之賦。半天鸞嘯。如對蘇門之遊。前以小子。甫離襁

身如外生
啓
襍。謬叨寵顧。榮溢圭璋。從此轅下之駒。便成
血汗。庶其樗櫟之姿。希冀棟梁。勤思明德。自
揣非分。第廿載陳人。蹉跎半世。一官鷄肋。匏
繫行間。徒望五雲。久虛三沐。特遴下走。遙貢
一占。洞庭衣帶。望東海以朝宗。老馬玄黃。借
孫陽而增價。

結聯風韻可掬

賀黃布政陞太常

恭惟閣下。興朝鼎。清廟琮璜。窺制作于承
明。代傳燕許之手。擬衣冠于華胄。羞稱王謝
之家。象笏連床。虎觀接武。譬之飛仙脫胎。無
不游蓬萊而棲閭苑。還如活佛教世。有時拔
火宅以渡慈航。既視草夫鸞坡。名在敬輿。永
叔之上。還唱籌于鄂渚。業與關中。河內比隆。
所以朝廷無南顧之憂。將留心于制作。兼之
明公有北闕之戀。宜晉秩乎夔龍。叔孫陳綿

最之儀。遂開西漢文治。桓榮正更老之位。爰啓東都典型。某荒微俗吏。草野孤生。紫陌紅塵。回首憶燕臺之舊。同心不啻如蘭。朱陵湘水。撫膺念江夏之知。異地忽聞折柳。比蠡芒之貢。從沼沚以輸誠。緘鴈陣之書。向關河而問訊。邀光行李。如再班荆。

散散比耦。敲金戛玉。自中宮商

候撫臺張年 啓

恭惟台臺金甌調鼎。玉尺禔躬。泰階耀六符之祥。細柳遙連江水綠。箕疇衍五福之慶。芳梅乍遞楚山紅。聖天子頒曆而紀元。再見春王。正月太中丞拜表而獻歲。適逢萬壽無疆。青陽左个。震序東方。翼軫居離明之位。星分朱鳥。岳列祝融。山川排送暖之司。南詔之閏位來歸。王會圖呈于萬國。夜郎之職方隨靖。皇恩溥遍乎三陽。錫彤弓以專征。勳業在五

侯九伯之上。歌采薇而飲至。歡聲滿方城。漢水之間。將見調一氣以轉鴻鈞。行且開八荒以來燕賀。某荒陲稱吏。澤國逢年。睹茲歲月之維新。更覺草木之再造。伏願椒盤曉薦晴嵐霽。栢府之霜。惟茲芹曝輪誠。和露滋蕝。皆之潤負。冰泮渙情。同武昌之魚書。字翱翔。竊附衡陽之鴈。仰惟存注。可勝瞻依。

出嫻嫻一二語都非人間

青詞爲經略洪公作

皇帝十有四年。大學士太傅經略洪公。駐師長沙。時以天氣酷暑。軍務殷繁。遂至失調。力疾治事。文武軍民。齋心祓除。蠲吉擊牲。告于岳瀆城隍之神。爲萬民請命。其詞曰。竊惟天地祖宗之靈。篤生元臣。以壽王國。卽鍾岡陵松柏之姿。利賴羣生。而錫永命。所以秦誓思黃髮。用整殽函之師。小雅頌元老。聿奏荆蠻。

之績。惟將相之兼資。在軍國尤爲重事。今者
一人御宇。萬國同軌。夔龍輻輳于彤庭。召虎
專闢於疆場。惟我皇上。念滇黔未闢。百粵甫
靖。推轂元老。式闢南荒。牂牁夜郎。處處塵來
蕪之望。合浦日南。人人倒蚩尤之旗。惟我元
臣體葛丞相之小心。罰不懈于二十以上。具
陶太尉之精鑒。事無略于木屑竹頭。以故日
旰而食。夜分不寐。公忠殫于國家。捐糜不愛。

兼以地氣卑溼。天道溽暑。寒熱交侵。飲
食不進。在事官吏。人人願以身代。合郡父老
家家爲之六祝。維茲明神。爲天司吏。爵秩準
之公侯。陰陽參乎造化。念傳說乘箕尾以降。
上列星辰。李晟爲社稷而生。毓靈河岳。昔文
武兆三齡之夢。上帝云錫。河洛闡五福之瑞。
壽考最先。伏願惟神。籲帝爲國延麻。勿藥有
喜。第祿而康。圖上金城之略。趙營平獨稱老。

臣威誓契丹之使。文潞公繫。惟皓首外國。問
裴度之年。四海仰汾陽之福。臣等無任迫呼
虔懇長跽焚禱之至。

言之不誣。可通帝座。

迎柯提督小啓

恭惟大將軍台臺。韓彭碩望。衛霍雄名。屯田
得江漢之心。峴上曾傳羊。開府據鞍定蠻溪
之亂。湖南再見馬。伏波銅鑣響。而玉露寒。瀟

湘秋滿芙蓉幕。鐵騎嘶而金飈發。翼軫星臨
虎豹關。三鼓奪崑崙。狄武襄不足方。駕七擒
渡瀘水。葛相國。佇看齊驅。嗟此羽林之健兒。
忽作潢池之赤子。鼓祠夜驚。竟比漁陽之戈。
反面稱兵。敢作桂林之戍。義旗南指。赤沙湖
草皆春。貫甲星行。朱鳥征鴻。不度。弟自別大
堤。一官南楚。共醉檀谿之月。久識大將之旌
旗。重逢湘水之遊。遠邁新知之杵。曰合江亭。

上。一。尊。酒。夜。來。聞。興。霸。之。聲。雲。母。山。西。半。幅。
箋。從。事。傳。劉。弘。之。紙。謹。介。使。以。通。札。聿。長。跪。
以。緘。辭。

如此驚艷在應酬中字字堪惜



